

# Dithero tsa Tirelano mo Kutlwanong

45/2015 Thero ka Sontaga wa 13 morago ga moletlo wa Borarobongwe, e le ka 30. 08. 2015

**Mo leineng la Modimo o e leng Rara le Morwa le Mowa o o Boitshepo!**

**Lefoko le le okamelang beke eno, le kwadilwe mo go Math. 25:40, le re: "Tsotlhe tse lo di diretseng mongwe wa bonnake ba babotlana ba, lo di ntiretse."**

1. Sefela sa 390 - 357/365

**2. Thapelo:** Modimo, Rara wa rona yo o mo legodimong, re a leboga, gonne ke letsatsi la Sontaga kajeno, re a leboga, ka o fentse loso ka letsatsi la ntlha la beke ka tsogo ya ga Morwao mo losong. Re a leboga, gonne go fitlhela mo letsatsing la kajeno o sa ntse o kgobokanya phuthego ya gago mo lefatsheng lotlhe ka letsatsi le gore e direlwe ke wena ka lefoko la gago le ka selalelo sa mmele le madi a ga Morwao, o re direle, Rra, le kajeno ka Mowa wa gago gore re utlwe, re ithute lefoko la gago ka boitumelo. O re direle ka Mowa wa gago gore le rona re nne re go direle, le bangwe-ka-rona ka lorato lo lo tshwanetseng. Re kopa jalo mo leineng la ga Jesu Keresete yo e leng Morena le Mopholosi wa rona. Amen.

3. Lefoko la Testamente e kgologolo le kwadilwe mo go Gen. 4:1-16;

Epistolo ka fa thulaganyong ya 2 e kwadilwe mo go 1 Joh. 4:7-13;

Efangele ka fa thulaganyong ya 3 e kwadilwe mo go Mark. 3:31-38.

4. A go ipolelwe tumelo ya bokeresete!

5. Sefela sa 299 - 274/280

6. Thapelo ya mmadi wa thero.

**7. Efangele** ka fa thulaganyong ya 1 e kwadilwe mo go Luka 10:25-37, e re: "Ke fa moruti-wa-molao mongwe a ema, a mo lalela, a re: 'Moruti, ke tla dirang gore ke rue botshelo jo bo sa khutleng?' Jesu a mo raya a re: 'Go kwadilwe eng mo molaong? O buisa jang?' Ene a araba a re: 'Rata Morena, Modimo wa gago, ka pelo yotlhe le ka mowa otlhe

le ka thata yotlhe le ka tlhaloganyo yotlhe ya gago; le mongwe-ka-wena o mo rate jaaka o ithata.' Jesu a mo raya a re: 'O arabile sentle; dira jalo, mme o tla tshela.' Mme ene, ka a rata go itshiamisa, a raya Jesu a re: 'Mme mongwe-ka-nna ke mang?' Jesu a araba a re: 'Motho mongwe o kile a tswa Jerusalema, a ya kwa Jerigo, mme a wela mo dinokwaneng. Ya re di sena go mo apola le go mo ntsha dintho, tsa tsamaya, tsa mo tlogela a le gaufi le go swa. Ga dirafala, moperesiti mongwe a fologa ka tsela eo, mme ya re a mmona, a mo feta fela. Fela jalo le Molefi, ya re a fitlha felong foo, mme a mmona, a mo feta fela. Mme Mosamaria mongwe a eta, a fitlha fa a leng teng. Ya re a mmona, a tlhomoga pelo, a ya fa go ene, a fapa dintho tsa gagwe, a di tshela lookwane le weine, a ba a mo palamisa pelesa ya gagwe, a mo isa kwa ntlong ya baeti, a mo tlamela. Ya re kamoso a ntsha diselefera tse pedi, a di naya mong wa ntlo, a re: 'Mo tlamele, mme se o tla se ntshang bogolo go moo, ke tla se go busetsa, fa ke boa.' 'O gopolang, ke mang wa ba bararo ba, yo e neng e le mongwe-ka-ene, yo o wetseng mo dinokwaneng?' Yoo a re: 'Ke yo o mo diretseng ka kutlwelo-botlhoko.' Jesu a mo raya a re: 'Tsamaya, o dire jalo le wena.'" Amen.

**8. Thero:** Phuthego e e rategang ya Morena wa rona Jesu Keresete, Efangele ya lefoko la thero ya kajeno e tlhagile mo tshimong ya Etene. "Jaanong Modimo wa leba dilo tsotlhe tse o di dirileng, wa fitlhela di le molemo thata," Gen. 1:31a. MORENA Modimo o ne wa tsaya motho, wa mmaya mo tshimong ya kwa Etene gore a e leme, a e tlhokomele. MORENA Modimo wa laela motho, wa re: "O ka ja mo ditlhareng tsotlhe tsa tshimo ka kgololesego. Fela setlhare sa kitso ya molemo le bosula sona o se ka wa se ja! Gonne ka letsatsi le o se jang, o tlike go swa," Gen. 2:15-17. Ke gore Modimo o ne wa baakanyetsa motho tsotlhe sentle thata gore a kgone go tshela sentle mo tshimong ya kwa Etene. Taolo ya Modimo e ne e le e e botlhofo thata, gonne o ba nikele ditlhare tsotlhe, fela wa laela gore a se ka a ja ga setlhare se le sengwe. Taelo ya utlwala sentle, ya re: "O se ka wa ja!" Taelo eo e utlwala, e tlhaloganngwa ka dipuo tsotlhe ka Sezulu, ka Setswana, ka Sejeremane, ka Seburu, ka Seesimane. Atame o ne a e utlwa sentle, mme a raelwa, a wela mo boleong, o ne a ja ga setlhare sa go itse molemo le bosula.

"Moruti, ke tla dirang gore ke rue botshelo jo bo sa khutleng?" Barategi mo Moreneng, botshelo jo bo sa khutleng re bo batla rotlhe, re a bo rata. Botshelo jo bo sa khutleng re a bo rata, re a bo batla. Modimo wa tlhola motho gore a tshele sentle mo tshimong ya kwa Etene, mme motho o ne a sa o ikanye, a latela tsietso ya ga Satane. Ka jalo motho wa

ntlha o tsentsa loso mo lefatsheng. Go tloga foo loso ke kabelo mo botshelong jwa rona mono mo lefatsheng. "Gonne ka letsatsi le o se jang, o tlile go swa." Go fapaana le thato ya Modimo go re tlišetsa loso. Go tlola ditaolo tsa ona ke boleo, ke tshiamololo, go a re bolaya. Ke se re se rutiwang mo phitlhong nngwe le nngwe. "Ka moo he, boleo bo tsenye mo lefatsheng ka motho a le mongwe fela, le loso ka boleo, mme loso lwa phololela jalo mo bathong botlhe, ka ba leofile botlhe," Baroma 5:12. Ke gore go ka tlhologanngwa ka botlhofo: Yo o sa leofeng o a tshela, mme yo o leofang o a swa.

Jaanong rotlhe re tshwanetse go gopola gore rotlhe re baleofi ka fa tthagong ya rona, ka re le dikokomana tsa ga Atame. Batsadi ba rona e ne e le baleofi, ba tsala baleofi, e bong rona. Le rona re tsetse baleofi, gonne baleofi ba tsala baleofi. Ke gore rotlhe re tla re tla swa, fa Morena a sa bowe pele ga loso lwa rona. Kana "loso lwa phololela jalo mo bathong botlhe, ka ba leofile botlhe." "Moruti, ke tla dirang gore ke rue botshelo jo bo sa khutleng?" A re tlhokomeleng. Moitse wa molao o ne a lalela Jesu ka potso eo. O ne a sa ikaelele go rutiwa, mme o ne a leka go tshwara Jesu ka potso ya gagwe, Mme Jesu o ne a mo araba, a mo ruta ka go mmotsa le ene, a re: Wena yo o leng moruti-wa-malao, ka o itse molao, o a reng: "Go kwadilwe eng mo molaong? O buisa jang?" Bakaulengwe, mo Efangeleng ya kajeno molao wa Modimo o rutang, Modimo o a reng ka ditaolo tsa ona. Dipolelo tse di lesome di botlhofo, rotlhe re di ithutile. Moruti-wa-molao o ne a itse sentle thata, "a araba a re: 'Rata Morena, Modimo wa gago, ka pelo yotlhe le ka mowa otlhe le ka thata yotlhe le ka tlhologanyo yotlhe ya gago; le mongwe-ka-wena o mo rate jaaka o ithata.'" Ka karabo ya gagwe moruti-wa-molao o ne a akaretsa molao otlhe wa Modimo ka dipolelo tsa pedi, Le Paulo a kwala mo lokwalong go Baroma 13:8-10, a re: "'Lo fetse tsotlhe tse di tshwanetseng go lešwa, go sale go ratana fela; gonne yo o ratang yo mongwe o dirafaditse molao. Gonne ditaolo tse di reng: 'O se ka wa dira boaka, o se ka wa bolaya; o se ka wa utswa; o se ka wa supa tshupo ya kako; o se ka wa eletsa,' le fa go ka ne go le taolo e nngwe e sele, di akareditswe ka lefoko le le reng: 'O rate mongwe-ka-wena jaaka o ithata.' Lorato ga lo direle motho bosula, ke ka moo lorato e leng tirafatso ya molao." A re a lemoga gore molao wa Modimo o tlhologanngwa ka botlhofo. Ga o bue ka ditshwantsho, ga o bue ka masaitsiweng mo molaong wa ona, o laela, a re: "O ka ja!" wa re: "O se ka wa ja!" Gongwe namuhla o a re laela, wa re: "Rata Modimo!" "Rata mongwe-ka-wena!" Ke Setswana, barategi mo Moreneng, Setswana se a utlwala, se a tlhologanngwa.

Jesu o ne a boka moruti-wa-molao, a mo raya a re: "O arabile sentle." Ke gore o ne a kgona tthatlhobo ya gagwe, o ne a sa palelwe. Mme Jesu o ne a sa khutle foo, a tswelela ka go mmolelela, a re: "Dira jalo, mme o tla tshela!" Ke gore go itse molao ga go thuse. Go a batlega gore o tshegediwe, o dirafadiwe. Jesu a re: "Dira jalo, mme o tla tshela!"

Kana rona ba re ithutileng Kategisema le rona re leka go ipata ka pele, ka go ipolela gore re paletswe go o tshegetsatsa, le go o dirafatsa, mme moruti yole wa molao o ne a rata go itshiamisa, a botsa Jesu, a re: "Mme mongwe-ka-nna ke mang?" O ka re a re: Intshwarele! Ga ke itse mongwe-ka-nna. Ke gona ka moo ga nka ke ka mo direla, le e seng go mo thusa, le e seng go mo tlhokomela. Morena, re tlhalefile thata. Le Jesu o re ruta ka ga katlholo ya gagwe mo bofelong jwa malatsi ka go re ruta ka ba kwa molema ba ba tla arabang, ba re: "Morena, re go bonye leng, o tshwerwe ke tlala, gongwe o nyorilwe, gongwe o le moeng, gongwe o sa apara, gongwe o lwala, gongwe o le mo ntlong ya kgolegelo, ra se ka ra go direla?" Math. 25:44. Modimo o neile Atame phatlha gore a ipolele tlolo ya gagwe, mme Atame o ne a leka go itshiamisa, le go ipata a re: "Mosadi yo ò mo nneileng gore a nne le nna ke ene yo o mphileng leungo la setlhare seo, ka ja," Gen. 3:12. Go thata gore re inyatse, re ipolele maleo a rona, re ipolele bosula jwa rona. Ga re rate go ipolela gore re leofile, re dirile se se maswe. Le moruti wa molao yole o ne a itshiamisa, a re: "Mokaulengwe wa me ga ke mo itse." Re rata go itshupa, fa re le basiami, fa re le basiami le fa pele ga Modimo, re re: Re tla ja boswa jwa botshelo jo bo sa khuleng ka ntlha ya bontle jwa rona.

Jesu a simolola go bolela setshwantsho sa Mosamaria yo o neng a na le kutlwelo-botlhoko, yo o thusitseng monna yo o neng a wela mo dinokwaneng. Motho yole o ne a ratile go swa, mme ka thuso ya Mosamaria a phologa. Re tshwanetse go gopola gore Basamaria le Bajuda ba ne ba sa ratane, le e seng go utlwana. Ka tlwaelo ba ne ba sa thusanye thata. Ka gongwe bangwe mo go lona lo gopola tiragalo ka ga Jesu mo sedibeng sa ga Jakobe, fa a ne a kopa metsi mo mosading wa Mosamaria. Ene o ne a botsa Jesu a re: "Wena yo o leng Mojuta o ka kopa jang metsi mo go nna ke le mosadi wa Mosamaria?" Joh. 4:9. Ke gore Mosamaria yole wa setshwantsho sa ga Jesu o ne a supa kutlwelobotlhoko e kgolo thata, gonne o ne a thusa mmaba wa ba ga gabo. Re a gopola Jesu a raya bautlwi ba gagwe mo go Luka 6:27-32 a re: "Mme lona ba lo reeditseng, ke lo raya ke re: Ratang baba ba lona; ba ba lo tlhoileng lo ba direleng molemo. Tshegofatsang ba ba lo hutsang, lo

rapelele ba ba lo kgobang. Yo o go fapholang mo lesameng lengwe, o mo neele le le lengwe; yo o go tseelang kobo, le yona kojwana o se ka wa gana ka yona. Naya mongwe le mongwe yo o go kopang; yo o go tseelang tsa gago, o se ka wa di batla gape mo go ene. Direlang batho fela jaaka lo rata ba lo direla. Fa lo rata ba ba lo ratang, lo na le tebogo efe fa pele ga Modimo? Kana baleofi le bone ba rata ba ba ba ratang.” Yo o ratang a a buise go fitlhela mo temaneng ya 36, e e reng: “Nnang kutlwelobotlhoko, fela jaaka Rraeno a le kutlwelobotlhoko.” Re a lemoga gore go dirafatsa molao go bokete, ga go botlhofo, jaaka go o itse fela. Mosamaria yo o kutlwelobotlhoko yole a direla motho ka kutlwelobotlhoko, ka bopelontle, ka bopelonomi. Ga a a ka a botsa tse dintsi, a thusa fela, a thusa motho yo o neng a tlhoka thuso ya gagwe. “Dira jalo, o tla tshela!” Mosamaria yo o neng a na le kutlwelobotlhoko a thusa ka tse dintsi gore motho yole a phologe, ene yo o neng a wela mo dinokwaneng.

“O gopolang, ke mang wa ba bararo ba, yo e neng e le mongwe-ka-ene, yo o wetseng mo dinokwaneng?” Le foo moruti wa molao o ne a itse karabo sentle, a re: “Ke yo o mo diretseng ka kutlwelo-botlhoko.”

Jesu Keresete o re ruta ka lefoko la thero ya kajeno gore molao wa Modimo o re latlha rotlhe, o re senolela molato wa rona mo bathong ba le bantsi. Ga re a dira ka fa molao wa Modimo o re laelang ka teng. Gape a re utlweng sentle, fa re se na go ipata, gonne re itse gore molao o a re latlha. Ga re rate mongwe-ka-rona, jaaka re ithata, ga re mo utlwele botlhoko, jaaka Rara wa rona yo o mo legodimong, a re utlwetse botlhoko, le e seng go mo rata, jaaka Morwa Modimo a re ratileng. A re tshabeleng mo go Jesu Keresete mmogo le melato ya rona, ka re dumela gore ke ene yo o neng a e sikara yotlhe mo mmeleng wa gagwe.

Kana Jesu Keresete o ne a dirafatsa molao ka botlalo, ke ene yo e leng Mopholosi wa rona. A tla mo lefatsheng, a fitlhela batho ba ba neng ba wela mo babeng ba bone, ba e leng boleo, Satane, le loso lo lo sa khutleng. A sikara bosula jotlhe mo magetleng a gagwe gore a re golole, a re pholose, a re baakanyetse botshelo jo bo sa khutleng. A dirafatsa molao wa Modimo. Ka jalo a re bulela kgoro ya botshelo jo bo sa khutleng. Jesu Keresete a re direla bopelonomi, a rwala maleo, bolwetsi, loso lwa rona mo mmeleng wa gagwe gore re phologe mo losong lo lo sa khutleng, re je boswa jwa botshelo jo bo sa khutleng. Yo o

dumelang mo go ene o tla tshela ka bosenabokhutlo. Jesu ke ene Mosamaria yo o kutlwelobotlhoko yo e leng ene tota wa nnete. Yo o dumelang mo go ene o na le botshelo jo bo sa khutleng.

Ka re sa ntse re tshela mo lefatsheng, o batla mo go rona ba re leng barutwa ba gagwe gore re mo direle, re direle le bangwe-ka-rona. Re leke ka thata ya Mowa o o Boitshepo go dira tse di molemo, le go kgaogana le tse di maswe. Re thuse, re direle, re rate bangwe-ba-rona, jaaka ene o re thusitse, a re direla, a re rata, a re pholosa. Barategi mo Moreneng re na le tiro e kgolo mo go bangwe-ba-rona, e le tiro ya lorato. Jesu a re raya a re: Tsamayang, lo dire jalo le lona! Amen.

**9. Thapelo:** Morena, Modimo, Rara wa rona yo o mo legodimong, re lebogela lefoko la gago. O re utlwele botlhoko, re le bana ba gago, o re thuse gore re go sale morago mo tseleng ya gago go direla batho ba gago, o re itshwarele maleo a rona, le kwa re neng re sa direle teng bangwe-ka-rona ka fa tshwanelong. Re a leboga, ka o re rometse Morwao Jesu Keresete yo o re pholositseng ka madi a gagwe, o re bolokele mo tumelong ya go dumela mo go ene ka metlha. Re rapela jalo mo leineng la gagwe. Amen.

Thapelo ya Morena: Rara wa rona yo o mo legodimong ...

10. Sefela sa 298 - 237/247

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke P. C. Weber, ka ngwaga wa 2015.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.